

Super secundo articulo diligenter interrogatus respondit ut prius, se nichil scire nisi quod audiverat in civitate Pisana, quod dictus episcopus cum predicto Ludovico de Pisis recesserat et cum eo et in eius comitiva iverat versus Urbem.

Super tercio articulo diligenter interrogatus dixit, quod in die coronationis predictae testis ipse fuit presens in prefata ecclesia Sancti Petri et vidit dictum Ludovicum intrantem ecclesiam pro recipienda corona et ipso Ludovico in ecclesia existente vidit ipse testis quendam ibidem missam publice celebrantem et dicebatur publice et communiter, quod ille missam celebrans erat episcopus Castellanus, ipse tamen testis non potuit discernere, si in veritate ille qui celebrabat erat episcopus Castellanus, tum quia multum ab altari ipse testis distabat nec appropinquare audebat, timens persone sue periculum, si cognitus extitisset, tum et quia notitiam persone ipsius episcopi non habebat.

Super quarto articulo diligenter interrogatus dixit, quod de predictis est publica vox et fama in Urbe, in Campania, Pisis et per totam illam contretam.

Ciquinus quondam domini Guillelmi de Advocatis de Luca testis iuratus super contentis in predictis articulis memoratam et puram dicere veritatem, super primo articulo interrogatus dixit, quod sicut referebat fama publica tempore, quo ipse qui loquitur erat Pisis, dictus dominus Iacobus episcopus Castellanus venit de civitate Pisana, in qua moram traxerat per aliqua tempora, ad diocesim Lunensem et licet in recessu suo dixisset, quod ad Romanam curiam veniebat, attamen in dicta diocesi predictum Ludovicum de Bavaria expectavit et post adventum eiusdem Ludovici ipsum Ludovicum fuit secutus usque ad civitatem Pisanam et ibidem in exercitu^a et in obsidione dicte civitatis fuit continue cum eodem, sibi adherendo et assistendo, et ipse testis vidit ipsum episcopum in exercitu ipso et cum Ludovicus intrasset civitatem predictam, in die quadam^b immediate sequenti vidit prefatum episcopum incedentem publice per civitatem predictam. Dixit etiam, quod publice dicebatur, quod dictus episcopus recessit a dicta civitate Pisana versus Romam cum Ludovico predicto. Et predicta dixit esse et fuisse notoria in civitate Pisana et locis circumvicinis.

a) 'exercitu' Or. immer. b) Folgt 'die' Or.